

# 210 lokasi masih terjejas

Sebanyak 210 lokasi di enam negeri iaitu Selangor, Negeri Sembilan, Terengganu, Kelantan, Pahang dan Kedah masih terjejas akibat banjir setakat jam 10 pagi semalam.

Pusat Kawalan Operasi Bencana, Agensi Pengurusan Bencana Negara (NADMA) dalam kenyataan memaklumkan lokasi tersebut membabitkan lapan daerah di Selangor, Negeri Sembilan (tiga), Terengganu (dua), Kelantan (tiga), Pahang (lapan) dan Kedah (tiga).

Antara lokasi yang terjejas akibat banjir itu adalah Bera, Jerantut, Maran, Raub, Pekan, Temerloh, di

Pahang dan Kuala Selangor, Kuala Langat, Hulu Langat di Selangor.

Rentetan kejadian itu, sebanyak 83 jalan persekutuan dan 126 jalan negeri terjejas membabitkan banjir kilat, banjir, cerun runtuh, jalan runtuh, jalan mendap dan jambatan rosak.

“Ada laluan yang masih ditutup untuk semua jenis kenderaan dan ada antaranya dibuka untuk kenderaan berat,” kata NADMA.

Antara laluan yang dibuka untuk kenderaan berat ialah Jalan Seri Keledang, Hulu Selangor; Jalan Banting-Semenyih; Jalan Lubok Kiat-Kubang Kuau, Pasir Mas; Jalan Kampung Paya Petai-Sungai Salan, Jerantut; Jalan Bukit Ragingin 3, Kuantan dan Jalan Serengkam, Maran.

Sebanyak 16

laluan dibuka untuk semua kenderaan antaranya di Jalan Benta-Lamir, Jalan Pekan-Batu Balik; Pekan serta Jalan Air Putih, Kemaman.

Sementara itu, paras air di beberapa sungai di tiga negeri iaitu Selangor, Pahang dan Kelantan mencatatkan tahap bahaya setakat jam 7 pagi berdasarkan rekod Ja-

batan Pengairan dan Saliran, Kementerian Alam Sekitar dan Air.

Menerusi laman web rasmi Public Infobanjir, tahap bahaya direkodkan di Sungai Langat di Bukit Changgang, Kuala Langat; Sungai Kuang di Kampung Melayu Seri Kundang, Gombak; Sungai Rasau di Tugu Keris, Klang; Sungai Pahang di Paya Gintong, Jerantut; Sungai Pahang di Kuala Krau, Temerloh dan Sungai

Pahang di Temerloh (Lubuk Pasu), Temerloh.

Selain itu, Sungai Pahang di Water Front, Bera; Sungai Bera di Jambatan Sungai Bera, Bera; Sungai Jengka di Jambatan Kampung Awah, Maran; Sungai Pahang di Lubuk Paku, Maran; Sungai Pahang di Kuala Sungai Chini, Pekan; Sungai Kuantan di Pasir Kemudi, Kuantan dan Sungai Golok di Rantau Panjang, Pasir Mas.

Ada laluan masih ditutup untuk semua jenis kenderaan



MANGSA banjir di Taman Sri Muda, Seksyen 25, Shah Alam kembali ke rumah bagi melihat keadaan kediaman mereka selepas paras air semakin surut.

# Bilangan mangsa banjir di empat negeri meningkat

**Kuala Lumpur:** Situasi semasa bencana banjir yang memasuki hari keenam sejak melanda negara 17 Disember lepas dilihat semakin baik berikutan peningkatan mangsa di pusat pemindahan sementara (PPS) tidak begitu mendadak pada pagi semalam berbanding kelmarin.

Negeri yang mengalami peningkatan jumlah mangsa di PPS adalah Pahang, Selangor, Negeri Sembilan dan Perak manakala Melaka kekal serta Kelantan terus mencatatkan penurunan.

Bagaimanapun, Kementerian Alam Sekitar dan Air (Kasa) kelmarin memaklumkan paras air sungai di beberapa negeri yang terlibat banjir masih berada pada paras amaran dan waspada kecuali di beberapa kawasan di Pahang yang menunjukkan trend menaik dan paras bahaya.

Di Pahang, aplikasi Info Bencana Jabatan Kebajikan



SUKARELAWAN dari pelajar Kolej Universiti Islam Antarabangsa Selangor (Kuis) membantu mangsa banjir di Kampung Bangi, Bangi. - Gambar NSTP/AZHAR RAMLI

Masyarakat (JKM) melaporkan jumlah mangsa banjir pagi semalam seramai 42,529 orang di 281 PPS di semua daerah kecuali Rompin dan Cameron Highlands.

Beberapa sungai utama juga masih melebihi paras bahaya dengan trend menaik seperti di beberapa lokasi di Sungai Pahang ter-

masuk Water Front Bera, Lubuk Pasu (Temerloh), Lubuk Paku (Maran) dan Kuala Sungai Chini (Pekan).

Jabatan Meteorologi Malaysia (MetMalaysia) pula meramalkan cuaca di sesetengah kawasan di Bera dan Bentong hujan pagi semalam manakala di daerah lain cuaca baik sebelum ribut petir dijangka berlaku di se-

setengah kawasan pada sebelah petang.

Sementara itu, pemegang konsesi lebuhraya utama di Pahang, Anih Bhd melaporkan laluan Bentong ke Karak di Lebuhraya Kuala Lumpur-Karak dan laluan Chenor ke Karak di Lebuhraya Pantai Timur Fasa 1 (LPT1) belum boleh dilalui bagi kedua-dua arah.

Jumlah mangsa banjir di Selangor pula berlaku sedikit peningkatan pada pagi semalam iaitu seramai 23,633 orang daripada 6,422 keluarga berbanding 23,375 orang daripada 6,349 keluarga pada malam kelmarin, melibatkan 128 PPS.

Selain itu, Ibu Pejabat Polis Kontinjen (IPK) Selangor memaklumkan 15 jalan raya termasuk lima lorong masih ditutup bagi laluan kenderaan setakat 4 pagi semalam, melibatkan sembilan Ibu Pejabat Polis Daerah (IPD) negeri ini.

Penutupan jalan itu mem-

babitkan Ibu Pejabat Polis Daerah (IPD) Subang Jaya dengan lima jalan; masing-masing dua di IPD Petaling Jaya dan Kuala Selangor; manakala satu jalan ditutup masing-masing di IPD Kuala Langat, Sepang, KLIA, Hulu Selangor, Shah Alam dan Sabak Bernam.

Di Negeri Sembilan, Pengarah Angkatan Pertahanan Awam Malaysia (APM) negeri Lt Kol (PA) Mohd Syukri Madnor berkata mangsa banjir setakat 8 pagi semalam adalah 329 orang daripada 89 keluarga di lima PPS bagi daerah Seremban dan Jelebu, iaitu meningkat seorang mangsa berbanding malam kelmarin.

Di Perak, sejumlah 268 mangsa banjir ditempatkan di dua PPS setakat 8 pagi semalam.

Jurucakap APM dan Sekretariat Jawatankuasa Pengurusan Bencana Perak berkata cuaca di lokasi banjir mending selepas hujan re-

nyai pada awal pagi semalam dan banjir dikhuatiri lebih buruk sekiranya hujan lebat berterusan.

Bagaimanapun paras semasa air di Sungai Bidor, Hilir Perak menurun kepada paras amaran iaitu 3.43 meter (m) berbanding kelmarin yang melepasi paras bahaya iaitu 3.80m.

Di Melaka, jumlah mangsa banjir kekal 165 mangsa daripada 41 keluarga setakat 8 pagi semalam, kata Pengarah Angkatan Pertahanan Awam Melaka Lt Kol (PA) Cuthbert John Martin.

Dalam pada itu, Kelantan menunjukkan penurunan jumlah mangsa banjir setakat 8 pagi semalam melibatkan 2,500 orang berbanding 2,617 orang kelmarin dengan 15 PPS dibuka di dua jajahan iaitu 10 di Pasir Mas dan lima di Kuala Krai, menurut Sekretariat Pengurusan Bencana dan Operasi APM Kelantan Zainuddin Hussin.